



PRIMEIRO MINISTRO

**DISKURSU HOSI ESELÉNSIA PRIMEIRU-MINISTRU
REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO,
IHA BIBAN APREZENTASAUN
PROPOSTA LEI
ORSAMENTU JERÁL ESTADU BA 2016**

**Parlamentu Nasionál
Loron 1, fulan dezembru, tinan 2015**

Eselénsia

Señor Prezidente Parlamentu Nasionál

Eselénsia

Vise-Prezidente sira, Parlamentu Nasionál nian

Eselénsia

Señor no Señora Deputadu sira

Karu Kolega sira hosi Membru Governu

Señor no Señora sira

Povu Timor-Leste tomak,

Onra tebes ida, no ho sentidu Estadu nian ida, maka ha'u hetan priviléjiu atu mai hasoru ho Ita Boot sira, Señor Prezidente, no distintu deputadu sira, iha Uma Fukun ida ne'e, atu apresenta Orsamentu Jerál Estadu nian, ba tinan 2016.

Proposta ida ne'e, ne'ebé ohin ha'u mai apresenta no defende iha ne'e, reprezenta programa no política finanseira, ekonómika no sosiál sira ne'ebé sai krusiál atu Governu Konstitusionál da-VI bele kaer país ida ne'e hodi hasa'e kondisaun moris, ita nia povu nian. Ho ida ne'e, bele jere ho efisiénsia osan público nian sira, bele kumpri Programa Governu nian no, hanesan konsekueúnsia maka, atu la'o ba oin hodi bele kumpri mós Planu Estratégiku Dezenvolvimentu nian ba, tinan 2011-2030, nu'udar estratégia hirak determinante.

Iha fulan abril kotuk, ha'u mai, segunda vés, hasoru ho ilustre audiénsia ida ne'e, lori responsabilidade atu apresenta Orsamentu Retifikativu ba tinan 2015, ne'ebé sai hanesan Orsamentu kontinuidade. Ohin, nafatin ho sentimentu ida ne'e, ha'u submete ba diskusaun iha nível ida ás liu ne'e, primeiru Orsamentu Jerál Estadu nian hosi Governu Konstitusionál ba da-VI.

Halo Orsamentu ida, la'ós buat ida fasil ka lalais. Maibé difisil no neneik atu desidi política, prioridade hamutuk ho ninia orsamentasaun sira, hodi bele hetan dalan ida diak liu ba país no ba povu, presiza iha responsabilidade dobradu, iha minúsia no rigór, sa tan ba iha hahalok ida ne'e tama tan ho monitorizasaun no avaliaisaun kona-ba orsamentasaun hirak uluk karik iha duni rezultadu sira ne'ebé ita hein ka lae.

Membru Governu Konstitusionál da-VI sira, haka'as-an duni iha ninia faze preparasaun hotu-hotu, sira avalia no avalia hikas fali meiu sira, atu to'o ba finalidade, ne'ebé sira kaer hanesan kompromisu, hodi haré mos kapasidade ema ida-idak nian iha halibur rezultadu hirak hosi orsamentasaun hirak uluk nian. Ami sai ejijente no konsentra ami nia-an ba hala'o servisu hirak diak liu ba povu, hodi halakon tiha despeja hirak supérfluu no tau neon nafatin ba krejmentu no dezenvolvimentu ekonómiku no sosiál ba país no ba populasaun.

Estrutura foun Governu nian loke dalan ba nosaun ida, iha ninia kompromisu, programa, atividade no objektivu tomak, ne'ebé atu alkansa iha ministériu ida-idak, no ninia reajuste ne'ebé nesesáriu atu evita desperdísiu sira. Reorganizasaun ida ne'e permite ami atu konsentra ami nia esforsu hodi bele kompreende didiak kona-ba saida deit maka ami devia no presija korrije no nesesidade hirak ne'ebé eziye ami atu devia introdús dinamika no prioridade foun.

Nune'e, maka proposta Orsamentu Jerál Estadu nian ba tinan 2016 hamutuk dólar millaun 1.562,233, inklui empréstimu sira. Montante totál mai hosi soma hamutuk kategoria orsamentál, no konkretu liu maka:

- **Saláriu no Vensimentu sira:** dólar millaun 181,529;
- **Bein no Servisu sira (inklui FDKU):** dólar millaun 468,988;
- **Transferénsia pública sira:** dólar millaun 475,775;
- **Kapitál Menór:** dólar millaun 17,565;
- **Kapital Dezenvolvimentu (inklui FI):** dólar millaun 418,376;

Valór ne'ebé ami propoin ne'e, tun uitoan kompara ho Orsamentu ida uluk nian no resulta hosi análise ida realista no klean kona-ba nesesidade no prioridade sira, hodi iha konsiderasaun konjuntura mundiál, baríl mina-rai nia folin tun, ne'ebé bele afeta ekonomia mundiál, maibé sempre ho preokupasaun atu labele sés-an hosi investimentu kontínuu iha área hirak ne'ebé permite ita atu nafatin lori ba oin diversifikasiadaun no kreiximentu sustentavel iha ita nia ekonomia.

Atu Timor-Leste bele sai nu'udar país ida ne'ebé ho rendimentu médiu ás, to'o tinan 2030, maka presija kreiximentu ida forte no ho kualidade ekonomia naun-petrolíferu ida boot. Entre tinan 2007 no 2012 Governu implementa ona política ekonómika hirak ne'ebé lori ita ba taxa kreiximentu ekonómiku ida ás, ho PIB naun-petrolíferu ne'ebé sa'e ho média 10,6% tinan ida.

Taxa kreiximentu sira ne'e mai hosi projektu infra-estrutura hirak boot, ne'ebé prevee ona iha PED, atu bele finansia investimentu ho kualidade iha infra-estrutura no iha dezenvolvimentu kapitál umanu hodi bele kria baze hirak nesesáriu ba dezenvolvimentu sustentavel ba prazu naruk.

Iha prazu médiu, prevee ona katak PIB naun-petrolíferu bele buras entre 4,1 no 7,5 %. Previzaun kona-ba kreiximentu maka'as ida ne'e, hetan nia hun iha implementa projektu infra-estrutura nian sira no iha kombinasaun ida ekilibradu entre investimentu Estadu nian, setór privadu nian no família sira nian.

Panorama ba konsumidór timor-oan sira iha prazu médiu mos sai pozitivu, ne'ebé prevee katak nível konsumu sa'e ho forma graduál no katak inflasaun anuál sei permanese iha besik 2%, iha kellas meta orsamentál Governu nian ho 4% to'o 6% nia okos, iha tinan 2015 no 2018.

Relaciona ho reseita doméstika sira, prevee tiha ona aumentu uitoan iha tinan 2016, tandoit reforma hirak ne'ebé oras ne'e la'o hela, la'ós deit iha fiskal maibé mos iha ekonomia, ne'ebé sei iha efeitu hirak signifikativu iha tinan 2017, iha nível dezempeñu servisu governu nian ida diak liu, liu hosi kobransa hirak boot no liu hosi aumenta baze koleta impostu no taxa nian sira.

Eselénsia,

Montante Orsamentu ne'ebé ohin ami mai propoin maka, Ita Boot sei rekoñese ida ne'e, ás liu ida ne'ebé ami foun-foun define hanesan "kakuluk fiskál nian".

Bainhira Governu promove "Jornada Orsamentál", nia halo ida ne'e ho intensaun atu inspira disciplina fiskál ida boot liu, hodi hamenus gastu hirak supérfluu, no defini Prioridade Nasionál sira ba tinan 2016. Iha tempu ne'ebá ami establese "envelope fiskál" ida ho valór dolar rihun millaun 1,3 no ami estipula edukasaun, saude, agrikultura no infraestrutura bázika sira hanesan área liu bá prioritária investimento nian.

Maski nune'e, valór hirak ne'e la'ós valór sira ne'ebé ohin ami apresenta no fatia boot investimento nian, efetivamente, halai liu ba infraestrutura hirak boot, ne'ebé maka kontempla ona iha Fundu Infraestrutura nian, hanesan iha projeto sira iha estrada nian, portu no areoporto no saneamento, Tasi Mane no projektu no programa sira kona-ba dezenvolvimentu ekonómiku no sosial hanesan Rejiaun Espesiál Administrativa Oe-Cusse Ambeno, Zona Espesiál Ekonomia Sosiál Merkadu Oe-Cusse Ambeno no pensaun sira ba veteranu sira, ba ema idozu no deficiente sira, ba ema vítima dezastre naturál sira nune'e mos apoiu liu hosi "Bolsa da Mæ".

Tanba ne'e, ami nia devér atu esplika ba povu Timor-Leste, ne'ebé reprezenta hosi Parlamentu Nasionál, kona-ba razaun hirak ne'ebé halo Komité Revizaun Polítiku hola desizaun ida ne'e.

Investimento ne'ebé ás iha infraestrutura, ami rekoñese hanesan etapa esensiál ida ba estratéjia dezenvolvimentu nasionál. Tamba ne'e maka ami prepara ona projeto sira tuir nesesidade hirak identifika tiha ona no ami hahú hala'o ona investimento no konstrusaun sira. Klaru katak aspetu multianual hosi projeto sira ne'e difikulta ami atu halo planeamentu no orsamentasaun, ho konsiderasaun ida katak kompromisu hirak ami simu ne'e, no nesesidade finansiamentu hirak asosiadu ho projeto sira ne'e, ezije ami atu hasán responsabilidade sira, hodi tenki partilla ba malun, tanba responsabilidade hirak ne'e mai hosi iniciativa sira kona-ba interesse nasionál nian.

Tanba ida ne'e duni maka ami haka'as-an atu kontinua ho projeto infraestruturas lubuk ida, e'ebé maka hala'o tiha ona, tuir-tuir malun, hosi governu hirak uluk nian. Projektu ho folin ás, ne'ebé sai krusiál no tranzversál ba dezenvolve setór oin-oin no país, no projeto sira ne'e dada maka'as investimento, ne'ebé agora labele hamenus nia ritmu tanba bele kompromete sustentabilidade hotu-hotu, investimento no kompromisu hirak hala'o ona to'o oras ne'e. Tanba ne'e, maka servisu ne'ebé ami hala'o hodi tenta atu kumpre "kakuluk

orsamentál”, maski ami seidauk konsege alkansa buat ne’ebé ami propoin, servisu sira ne’e lori dixiplina ida no análise rigorozu liu tan.

No hodi haraik-an ami rekoñese katak kakuluk fiskál ida realista labele determina sein koñesimentu ida klaru kona-ba kustu implementasaun ba programa, politika no projektu nian sira, ka bele dehan, kona-ba nesesidade finanseira no orsamentasaun setór sira nian iha kada programa. Ida ne’e vale tebes atu orsamenta kustu implementasaun nian hanesan, porezemplu, politika edukasaun nian, ne’ebé define kritériu sira atu garante ensinu ida ho kualidade nune’e mos atu orsamenta kustu infraestrutura nian sira, ne’ebé ita investe hela, basá ita koalia kona-ba investimento prazu naruk nian sira, ne’ebé ezije rigór no avaliasaun, tanba bele kompromete sustentabilidade fiskál ne’ebé maka ita rai iha neon hodi defende hanesan buat esensiál ida.

Ezersísiu previzibilidade ne’ebé ha’u koalia ne’e esensiál duni, la’ós deit ba Governu ida ne’e, maibé mós ba Governu hirak tuir mai, atu nune’e bele determina envelope fiskál hirak konsistente liu ho nesesidade hirak real no obrigasaun Estadu nian sira, hodi labele duni ignora sustentabilidade orsamentál hosi ita nia país joven ida ne’e.

Ami nia kompromisu sempre hola diresaun ba hala’o servisu ne’ebé diak liu ba povu, liu-liu iha área hirak ne’ebé ami identifika hanesan prioritáriu, no ba korte sirúrjiku ba despeza hirak la presija, ba gastu hirak ne’ebé la fo benefisiu ka hadia kualidade moris populasaun nian.

Ami mos, durante hala’o preparasaun Orsamentu Jerál Estadu, ami verifika ona katak prestasaun servisu ida ne’ebé diak liu, la implika nesesáriamente aumentu nominál ka proporsionál ba orsamentu. Relasaun entre servisu no ninia mellor prestasaun, iha liu ligasaun ho ninia implementasaun no ninia kapasidade jestaun. No ida ne’e halo ami fier metin katak nesesáriu tebes atu averigua nesesidade no prioridade sira hosi kada ministériu, la’ós deit iha nível hosi sira nia atividade sira, maibé mos, no liu-liu, iha nível orsamentasaun no implementasaun.

Tamba ne’e maka ami konsidera fundamentál iha hari mekanizmu implementasaun nian sira, ne’ebé permite ita hala’o jestaun ida diak liu, liu hosi planeamentu ida diak no orsamentasaun ida diak ba planeamentu ne’e rasik no nia bele hatudu nia kustu real mai ita. No iha ne’e, maka ami hatene katak maski bele mosu redusaun orsamentu ne’ebé mos bele mai hosi orsamentasaun ba programa sira no hosi kapasidade implementasaun ne’e rasik, maibé ami la’ós atu tau ba kotuk prioridade politika kona-ba kualidade prestasaun servisu nian sira.

Pasu ida hosi pasu hirak seluk, ne’ebé ami konsidera fundamentál iha prosesu ida ne’e, maka atribuisaun autonomia boot liu tan ba ajénsia, institutu no ministériu sira. Ninia objektivu ne’e klaru: bainhira ita fo autonomia boot liu tan, ita mos husu responsabilidade boot liu tan! Jestaun diak no kapasidade implementasaun, akompaña ho monitorizaun rigorosa maka bele informa mai ita kona-ba rezultadu sira no, bazeia ba ida ne’e, maka bele

atribui orsamentu ida, tanba tenki iha evidénsia ne'ebé konfirma katak hetan duni rezultadu hirak ne'ebé ita hakarak.

Fo autonomia boot liu ida ne'e hanesan parte ida hosi dalan ne'ebé ita tenki hakut-tuir atu nune'e bele hetan kualidade iha prestasaun servisu Estadu nian, sempre ho responsabilidade másima iha ninia tutela, ne'ebé defini politika setorál nian sira no estratéjia implementasaun nian sira. Ami fiar katak bainhira ita hakarak eziji, ita tenki fo autonomia boot liu hodi kombina ho kondisaun ba servisu nian hirak adekuadu, nune'e mos ho responsabilizasaun hosi respetivu dirijente sira.

Tanba ne'e ami hakarak sai hosi atuál sistema finansas ne'ebé ho kontrolu *ex-ante* ba sistema kontrolu *ex-post* nian ida. Ka bele dehan Ministériu Finansas sei la hala'o tan funsaun atu aprova despeza hotu-hotu, no funsaun ida ne'e sei fo ba órgaun no Ministériu sira, no ida ne'e sei akontese ho forma progresivu, akompaña ho formasaun, mobilizaun rekursu umanu, tuir ezijénsia sira no kapasidade oin-oin ne'ebé eziste iha instituisaun oin-oin Estadu nian.

Maibé ida ne'e la signifika katak sei la iha tan kontrolu, rigór no responsabilizasaun hosi dirijente sira nian. Lae, la'ós hanesan ne'e, kontrolu sei hala'o liu hosi aprovisaun kuadru reguladór kontrolu internu Estadu nian ida, ne'ebé sei bele permite hala'o tranzisaun hosi kontrolu ex-ante ba fali ex-post. Nune'e maka sei mosu responsabilidade oin-oin entre setór auditoria no inspeksaun sira, ho Inspeksaun-Jerál Estadu nian, bainhira atu hala'o auditoria sistemática sira no iha responsabilizasaun hosi ninia dirijente sira.

Medida seluk atu introdús ho forma konsistente iha planifikasioun ba dezenvolvimentu nasional, liu-liu kona-ba infraestruturas sira, maka kriasaun Programa Operasaun no Manutensaun ida. Ami fiar katak Programa ida hanesan ne'e sei kontribui, la'ós deit ba sustentabilidade ne'ebé ita hakarak uza ba investimento hirak ne'ebé hala'o hela, no katak sai, aliás, preokupasaun justu ida hosi ilustre Deputadu sira, maibé mos hanesan medida impulsionadora ida kona-ba kriasaun empregu ho durasaun naruk iha nível nasional.

Eseléncias,

Governu da-VI hahú dadauk ona reorganizasaun interna ida, ho objetivu atu asegura ligasaun ida entre planu no orsamentu, no iha reorganizasaun ne'e ami adota prinsípiu ida: planu ida, orsamentu ida, sistema ida!

Ami hakarak establese iha órgaun governu nian hotu-hotu Unidade ida kona-ba Planeamentu, Monitorizasaun no Avaliasaun atu nune'e bele kria estrutura no kapasidade ba implementasaun hosi prosesu ida ne'e. Planu anuál sira, relatório sira kona-ba dezempeñu, planu sira no relatório sira kona-ba aprovizionamentu maka sai nu'udar ferramenta sira kona-ba planeamentu, monitorizasaun no implementasaun, ne'ebé bainhira hala'o ho forma koordenada, sira sei lori transparénsia boot liu no, lori mos responsabilizasaun boot liu liu hosi dezempeñu ministériu nian relasiona ho kompromisu hirak ita simu ona.

Kala Distintu Deputadu sira hetan ona oportunidade atu simu no analiza rezultadu hosi esforsu ida ne'e, bainhira simu Livru 2 kona-ba Orsamentu, no iha neba bele konstata katak, foin ba dala-uluk, maka planu anuál ne'e tama iha orsamentu.

Servisu ida ne'e, la seluk la let, selae rezulta hosi servisu ida ezipente hodi liga planu ho orsamentu. No ida ne'e maka ami halo iha análise minusiozu no kriteriozu ida kona-ba planu atividade nian, hodi tenta atu, ho rigór, atribui orsamentu ida ba planu ne'e, hodi bele hetan relasaun ida diak liu entre sira na'in rua, no korrespondénsia ida diuk liu entre osan públiku ne'ebé gasta ona no servisu hirak ne'ebé hala'o tiha ona.

Ida ne'e maka tentativa ba da-uluk, ne'ebé ami hala'o iha tempu ida badak tebes, ne'ebé bele kontinua dezenvolve iha tinan 2017, no iha tinan hirak tuir mai, liu hosi definisaun ida rigorosa kona-ba programa sira iha kada setór, hodi integra planu, orsamentu, implementasaun no verifikasiun ba rezultadu sira ho forma ida integrada, iha sistema ida deit nia laran. Definisaun kona-ba programa sira no kona-ba ninia kustu implementasaun nian sira, iha perspetiva plurianuál ida, sei evita atu ita hahú hosi zero bainhira ita elabora planu anuál no orsamentu. Liu tan ida ne'e, ami evita atu planeia atividade sira, karik atividade sira ne'e la tama iha orsamentu.

Nune'e, no ho karater ida operasional liu, ami iha tinan 2016 sei hetan ona ferramenta jestaun nian foun hanesan planu implementasaun atividade no despeja sira no planu aprovisionamentu. Buat hirak ne'e sei obriga órgaun governu nian sira atu halo pormenor liu tan no tau ba kalendáriu bainhira atu sosa bens, servisu ka obra sira, atu nune'e bele iha responsabilizaun ida boot liu bainhira implementa, la'ós deit fiziku maibé mos finanseira, kona-ba programa sira ne'e.

Atu bele akompaña planeamentu no ninia orsamentasaun maka ami tau regra ba monitorizasaun no avaliaun ba planeamentu no orsamentasaun. Monitoriza planu no orsamentu no avalia impaktu no benefísiu sira ne'ebé mak bele mosu hosi ne'e ba povu, maka garante prestasaun servisu ida efikás, eficiente no justu, ho reperkusaun hirak lós nian ba ema hotu nia moris.

Bainhira hahú ona ho prosedimentu ida ne'e, maka meta anuál hirak ne'ebé ami identifika ona iha planu sira, bele fasil liu ba Ita Boot sira, atu halo eskrutíniu no fiskaliza, hodi halo asaun Ezekutivu nian sai transparente liu no iha responsabilizaun liu tan.

Aleinde ida ne'e, mekanizmu ne'ebé Governu kria ne'e sei eziye tan kolaborasun ida metin liu tan entre responsavel sira hosi area oin-oin, hodi afina sai diak liu tan ninia rezultadu sira no, liu-liu, hodi permite atu ita identifika, iha tempu lolós nian, saida maka impide ninia implementasaun no atu hola medida no prekausaun hirak presija atu bele garante efikásia no efisiénsia ba programa sira ne'e.

No katak, ho deit rekursu umanu hirak kapasitadu, maka ita bele konsege prestasaun servisu ida diak liu, ami sei kontinua proporsiona, liu hosi Fundu Dezenvolvimentu Kapitál

Umanu, formasaun profisionál, formasaun téknika no bolsa estudu. Ba tinan 2016, bainhira aloka fila-fali fundu sira ba programa kona-ba Asisténsia Téknika ba Setór Judisiáriu no Tersíáriu, maka fundu ida ne'e sei inside liu-liu iha programa sira kona-ba formasaun jerál ne'ebé sei benefisia setór hotu-hotu.

No atu presija liu tan ninia utilizasaun, ami sei hetan iha primeiru trimestre tinan 2016, rezultadu hirak hosi "Mapeamentu Nasional ba Rekursu Umanu sira hosi Setór Públiku no Privadu sira, tuir munisípiu" no "Avaliasaun ba Rezultadu sira hosi Programa FDKU hosi tinan 2011-2014". Estudu hirak ne'e la'ós permite deit atu avalia rezultadu hirak ami hetan ona, maibé mos sei permite ami atu hetan nosaun diak ida kona-ba nesesidade sira, no ida ne'e sei tulun ami atu define iha área ida ne'ebé mak presija liu atu hala'o ajustamento iha formasaun no kapasitasaun ba ita nia rekursu umanu sira atu nune'e bele hasoru prokura merkadu nian.

Eselénsias,

Timor-Leste, tuir lolós, kontinua estimula investimento no sai país atrativu ida. Tanba ne'e ami haka'as-an iha reforma setór públiku. Ho ida ne'e ami hahú ona implementa reforma estratéjika sira, ne'ebé maka sei akontese durante tinan balun nia laran, no sei permite Timor-Leste bele hetan susesu iha dalan ba dezenvolvimentu nasional sustentavel.

Reforma Lejislativa no Setór Justisa nian sei hadi'a kapasidade setór lejislativu no judisiáriu sai diak liu tan, ne'ebé sei garante no protéje direitu povu nian sira no, liu-liu política kona-ba asesu ba justisa.

Reforma Fiskál – ne'ebé abranje politika sira kona-ba reseita no despeza, sistema jestaun finanseira pública sira, administrasaun fiskál no aduaneiru, jestaun Estadu, monitorizasaun ba rezultadu sira hodi haré liu ba prestasaun servisu no rekursu umanu sira -, sei permite ami atu aumenta reseita Estadu nian, hadi'a dezempeñu servisu nian sira no aumenta kualidade orsamentu, no seluk-seluk tan.

Reforma Administrasaun Pública ne'ebé inklui análise diagnóstiku ba rekursus umanus nian, estabelesimentu padraun kompeténsia nian sira, revizaun ba tabela salariál no identifikasiasaun estrutura organizasionál, sei kria kondisaun sira atu bele fo ba Estadu efisénsia, efikásia no responsabilidade barak liu tan. Ida ne'e hakarak mos fo ba administrasaun pública kondisaun hirak ne'ebé bele implementa ninia kompeténsia sira ba interesse público no, atu fo mos ba funzionáriu sira kondisaun hirak presija atu sira hala'o sira nia funsaun sira ho didiak. Tebes duni katak, ami bele deit ezije rigór, etika no profisionalizmu bainhira ita nia ema sira hatudu katak sira bele ona no sira hetan ona fatin ida lós atu hala'o sira nia funsaun sira.

Ne'e maka medida sira ne'ebé, tuir ami hatene sei kria kondisaun sira atu jere investimento no diversifikasiasaun ekonómika ne'ebé esensiál tebes ba país no tenki akompaña hosi estratéjia ida ne'ebé bele ajusta iha ema sira, iha infraestrutura sira no bele hatan atu kria kondisaun hirak ne'ebé bele fo kbiit ba investimento privadu.

No tamba ne'e maka Governu aprova ona nesesidade atu implementa Reforma no Fomentu Ekonómiku ida ne'ebé, ho relasaun ida forte ho Programa Reforma Fiskál, sei kria medida hirak ne'ebé ninia objektivu maka atu dezenvolve, reforsa no apoia setór privadu, ne'ebé bele jera empregu sustentavel no diversifika ekonomia. Ami hakarak hadi'a ambiente setór privadu nian no ba ida ne'e ami konxiente katak tenki regulamenta rai no propriedade sira, dezenvolve infraestrutura ekonómika nian sira, fo énfaze ba formasaun rekursu umanu sira no ba dezenvolvimentu maundobra, kria ambiente ida propísiu ba negósiu sira no tau atensaun ba investimentu no dezenvolvimentu privadu.

Ami hakarak, mos atu reforsa ita nia instituisaun bankária sira. Tanba ne'e maka ami hanoin fo kapitál ba Banku Sentrál Timor-Leste (BSDL) no mos Banku Nasional Komérsiu Timor-Leste (BNKTL) atu Banku ida ne'e bele kria kondisaun hirak ne'ebé bele facilita asesu ba kréditu, ba investimentu projetu nian hirak ne'ebé sustentavel no bele jere empregu, liu-liu iha zona rurál sira; Ita hein atu, ho ida ne'e, ita bele hetan emansipasaun ida iha setór privadu, iha área hirak ho natureza komersiál no investimentu, hodi husik Estado sai livre hodi lalika sai ator boot ida iha area hirak ne'e, atu nune'e nia bele konsentra-an diak liu tan iha protéje kestaun sosial sira.

Eselénsias,

Tinan 2016 sei sai hanesan tinan implementasaun mekanizmu ho instrumentu hirak ne'e hotu ne'ebé sei apoia ami iha jestaun ida responsável, efikás no sustentavel, hodi permite mosu ezekusaun osan público nian hodi kria kondisaun sira ba jere investimentu no diversifika ekonomia.

Ami fiar mos katak refleksu hosi proposta Orsamentu Jerál Estadu nian ida ne'e, ema hotu sei hatene iha Governu ida tuir mai. Governu Konstitusionál ba da-VI kontempla ona, iha proposta ba 2016 nian, montante ida ne'ebe destinadu ba selu tusan hirak ne'ebé iha. Ami hanoin katak Governu ne'ebé atu simu pose iha 2017, nia tenki hahú hosi kondisaun hirak favoravel liu, nune'e esensiál maka halo saneamento ho responsabilidade ba tusan sira, Hodi salvaguarda integridade no konfiansa iha Estadu.

Ida ne'e maka atitude ida ne'ebé sei permite atu, Governu ida tuir mai, bele iha ninia programa dezenvolvimentu rasik no kontinua mos assume implementasaun Objektivu hirak kona-ba Dezenvolvimentu Sustentavel, ne'ebé aprova ona iha Konsellu Ministrus no iha Parlamentu Nasional, no katak ami fiar buat sira ne'e sei lori ba kreiximentu no dezenvolvimentu sustentavel Timor-Leste nian, hodi halo nia sai país ida próspero no hasa'e kualidade moris ita nia populasaun nian.

No presizamente iha ótika ida ne'e, kona-ba "aliñamentu entre instrumentu no sistema planeamentu no orsamentasaun nian sira ho objektivu hirak hosi Dezenvolvimentu Sustentavel nian", ne'ebé Ita Boot sira sujere ba Governu, maka ami rekoñese importánsia hosi empeñu parte hotu-hotu nian atu kumpre ida ne'e.

Ho rezultadu preliminár sira hosi Sensu 2015 nian, ne'ebé ita konstata katak ita nia populasaun aumenta ona ba ema na'in 1,167,242, maka ami haka'as-an atu kontinua promove no garante klima seguransa, pás no estabilidade – objektivu ne'ebé Timor Leste, aliás, hetan partisipasaun ativa ida ne'ebé ema hotu rekoñese. Ami mos sei kontinua ajusta política hirak fundamentál liu, hanesan igualdade jéneru, ne'ebé reforsa ona ho Deklarasaun Maubisse, ne'ebé foin lalais asina ne'e, no protesaun ba ema defisiente no vulnerável sira.

Tanba ita nia populasaun maioria klosan, ami hakarak kontinua estimula kualidade iha formasau akadémika no profisionál no promove oportunidade empregu nian sira atu bele fo ba sira kondisaun hirak ne'ebé bele hamosu moris ida dignu, ativu, inkluzivu no sira bele partisipa iha dezenvolvimentu iha NASAUN ne'e. No tama sira maka futuru líder ba país ida ne'e, maka presija mos fo hanoin ba sira kona-ba kestaun alterasaun klimátika no dezastre naturál sira, ne'ebé tenki haré ba kestaun ne'e ho sériu tanba bele afeta maka'as tebes dezenvolvimentu sustentavel país no sosiedade ida ne'e nian

Kona-ba ida ne'e, permite ha'u atu koalia katak ami harí tiha ona klibur serbisu nian ida atu implementa Objektivu sira hosi Dezenvolvimentu Sustentavel ne'ebé, ho forma transversal, sei hala'o nia knar atu Timor-Leste bele konsege hetan ninia kompromisu sira ba Ajenda 2030 ba Dezenvolvimentu Sustentavel.

Asaun sentrál no prioritáriu ida maka luta ba ita nia soberania plena ne'ebé maka ita bele deit hetan liu hosi delimitasaun definitivu ita nia fronteira marítimu nian sira. Ami oras ne'e hala'o hela prosesu ne'e ho perseveransa total, basá direitu sira timor-oan nian labele relega fali ba planu segundu iha prioridade sira Estadu nian.

Ami nia asaun esterna, dezempeña iha ne'e, papel importante ida. Tanba ne'e maka ami kontinua haka'as-an atu fortalese ami nia pozisaun iha *fora* internasional sira, nune'e adezaun ba ASEAN no lideransa CPLP nian, ne'ebé ita hetan prezidénsia rotativa to'o tinan oin klaran, buat rua ne'e fo mai ita pozisaun *hub* ida, hosi *hub* sira seluk ne'ebé sai hanesan alavanka ida ba kreximentu ekonómiku. Mai ita mos kontinua fo onra ba ita nia kompromisu sira no fo apoiu ba país frajil sira, liu hosi klibur g⁷⁺ no, liu hosi Ajénsia Kooperasaun Timor-Leste nian, mai ita hakat ba oin hodi fo apoiu ba prosesu dezenvolvimentu iha ita nia país irmaun sira.

Eseléncias,

Ita foin selebra hotu tinan hatnulu aniversáriu Proklamasaun ita nia Independénsia no tinan 500 kontaktu entre povu Timor ho Portugés ho ne'ebé mak kontribui barak tebes ba harí no afirma ita nia identidade.

Maibé ita komemora mos iha tinan ida ne'e, tinan sanulu resin tolu hanesan Nasaun independente. Ita benefisia ona ambiente ida estavel, hamutuk ho pás no seguransa ne'ebé mos permite ita atu tau hamutuk politika ida kona-ba konsensu, relasiona ho estratéjia país nian, ne'ebé interesse nasional sira hetan fatin ás liu kompara ho interse individuál, ida ne'e maka motivu lolós hosi ita nia orgullo.

Atu remata, ha'u apela debate ne'e bele sai franka no konstrutivu hodi beke hariku ita nia sistema demokrátiku, nu'udar uluk kedesai hanesan tributu ida hosi distintu Deputadu sira, bainhira haré katak diskusaun sira ne'e sei fo liu ba politika sira, hamutuk ho ninia orsamentu, hodi imprime iha diskusaun ida ne'e nia laran, ninia interese boot liu, katak kualidade no relevânsia orsamentu Estadu nian ba tinan 2016 tuir mai. Kmanek wa'in ba Ita nia Nasaun!

Obrigadu barak.

Dr. Rui Maria de Araújo
Loron 1, fulan dezembru, tinan 2015